

# Бұлтсыз күн күліңдерей аспаныңда!

№17 (20 882)  
1 мамыр,  
2025 жыл, бейсенбі



# Атырау

Облыстық қоғамдық-саяси газет

Atyrau.gazeti  
atyrau\_gazeti@mail.ru  
Атырау газеті  
www.atr.kz  
«Атырау» газеті  
atyrau\_gazeti  
Atyrau\_news  
Атырау жаңалықтары

\*1 мамыр – Қазақстан халқының бірлігі күні



## Ардақты ағайын!

Баршаңызды 1 мамыр – Қазақстан халқының бірлігі күнімен шын жүректен құттықтаймын!

Көпұлтты елімізде тұратын этнос өкілдері арасындағы өзара түсіністік пен достықтың символы болып табылатын бұл мереке бәріміз үшін аса қымбат.

Мемлекет басшысы Қасым-Жомарт Тоқаев атап өткендей, «Бірлігіміз берік, мақсатымыз ортақ, рухымыз биік. Осылар арқылы біз жасампаздық пен өрлеу жолында кез келген қиындықты жеңіп, жаңа белестерді бағындырамыз».

Бейбітшілік пен достық – ойға жеңіл ұғымдар емес, олардың мағынасы кәрі тарих қойнауына жетелейді.

Бүгінде атыраулықтардың өзара түсіністік, ортақ мүдде жолында ынтымақтастықты берік ұстап, егемендікті асқақтатуға белсене атсалысып келеді.

Біз мұны әрқашан мақтан тұтамыз, әрі осы құндылықтарды қорғауға және нығайтуға тиіспіз. Жас ұрпақты отансүйісшілікке, толеранттылық пен қалыптасқан игі дәстүрге тәрбиелей беретін боламыз.

Қоғамдағы тұрақтылық пен келісім – Қазақстан мемлекеттілігінің негізін құрайтын басты байлығымыз болып қала береді.

Ынтымақ пен ырыс, татулық пен береке мерекесі шаңырақтарыңызға шарапатты шаттық сыйласын!

Ігі тілекпен,  
Серік ШӘПКЕНОВ,  
Атырау облысының әкімі

### \*Қоғамдық қауіпсіздік

## Қайда барсаң да камера

Атырауда 6 мыңнан астам камера «Target EYE» жүйесіне қосылып, қауіпсіздік шаралары күшейтілді. Жүйе бет-әлпет пен көлік нөмірін танып, күмәнді жағдайларды анықтау мүмкіндігіне ие.

Қосымша енгізілген сәттен бастап 53 адам тексерістен өткізіліп, 19-ы анықталды. Оның ішінде 2 адам іздеуде жүргендер қатарынан табылды.

«Target EYE» ақпараттық-бағдарламалық кешеніндегі 4000-нан астам камера қоғамдық орындарға орнатылған бейнебақылау камералары болса, 2000-нан астамы – интеграцияланған камералар (мектептер, балабақшалар, ойын-сауық орталықтары, базарлар және т.б.). 2025 жылдың ақпан айында

халық көп шоғырланатын нысандарға (сауда орталықтары, вокзал, әуежай, мектептер) бейнеаналитикалық камералар орнатылды, - деді Атырау Жедел басқару орталығының кезекші аға инспекторы Айдос Қошпанов.

Жүйе Ішкі істер министрлігінің ұсынысымен іздеуде жүрген қылмыскерлер, хабар-ошарсыз кеткен адамдар мен пробациялық бақылаудағы тұлғалардың деректерімен толықтырылды. Нәтижесінде бет-әлпетті тану арқылы биылғы 31 наурызда BAIZAAR сауда орталығында халықаралық іздеуде жүрген бір адам, ал 12 сәуірде Атырау халықаралық әуежайында 1991 жылғы тағы бір адам анықталып, полиция бөліміне жеткізілген.

Санжар АЗАМАТ

### \*Жағымды жаңалық

## Жұмысшы жастардың өз аллеясы бар

Атырауда өткен жұмысшы жастардың республикалық форумы аясында Жайық өзенінің оң жақ жағалауына «Жұмысшы жастар аллеясы» атауы берілді.

Форум шеңберінде ұйымдастырылған экологиялық акцияда еліміздің түкпір-түкпірінен келген өндіріс орнында еңбек ететін жастар, студенттер және кәсіпорын жетекшілері бірлесіп, жаңа аллеяға 100-ге жуық тал екті. Бұл іс-шара Жұмысшы мамандықтар жылы мен «Таза Қазақстан» экологиялық акциясы аясында қолға алынды.

Аллеяның ашылуы – жас жұмысшылар еңбегіне деген құрметтің, сондай-ақ жастардың ел дамуына қосып жатқан үлесінің айғағы. Сонымен қатар бұл бастама өңірде экологиялық мәдениетті дамытып, жасыл аймақтарды көбейтуге бағытталған, - деді Мәдениет және ақпарат министрлігінің Жастар және отбасы істері комитеті төрағасының орынбасары Біржан Әлімжанов.

Жұмысшы жастардың республикалық форумы еліміздегі техникалық және өндірістік сала мамандарының, жас жұмысшылар мен кәсіптік білім беру ұйымдарының студенттерінің басын қосқан маңызды алаң болды.

Бек АЙДАРӘЛІ

### \*Тағзым

## Қаламгерден қалған мұра

Мақат кентінде Ұлы Жеңістің 80 жылдығына орай соғыс және еңбек ардагері, белгілі публицист, ақын, ауданның Құрметті азаматы Тәжібай Текеевтің құжаттарынан жиналған «Қарымды қаламгер. Майдангер. Тұлға» тақырыбында көрме өтті.

Аудандық мемлекеттік архивтің ұйымдастыруымен өткен көрмеге аудан жұртшылығы, зиялы қауым өкілдері, тарихшылар мен мектеп оқушылары, қаламгердің көзін көрген ізбасарлары мен ұрпақтары қатысты. Шара барысында ауданның баспасөз саласының қалыптасып, өсіп-өркендеуіне сүбелі үлес қосқан Тәжібай Текеевтің шығармалары, мақалалары мен еңбек жолы таныстырылып, өлеңдері оқылды.

Қаламгермен әріптес болған Әсіма Жылқышиева, Күңзира Досниязова және Тойған Бектұрғановалар редакция мен баспаханадағы жұмыс барысынан сыр шертіп, Тәжібай Қабасұлы туралы өз естеліктерін айтты. Облыстық ардагерлер кеңесі төрағасының орынбасары, Т.Текеевтің шәкірттерінің бірі Серік Мұқамбетов оларға облыстық ардагерлер кеңесі төрағасының шешіміне сәйкес «Хиуаз Доспанова» төсбелгісін табыс етті.

(Соңы 7-бетте)

### \*Мәселе

БҰРЫНДАРЫ БІЛІМ МЕКЕМЕСІНДЕ БАСШЫЛЫҚ ЛАУАЗЫМ БОСАЙ ҚАЛСА, СОНЫ ИЕМДЕНУГЕ ҰМТЫЛҒАНДАР КӨП БОЛАТЫН. АЛАҚАНҒА САЛҒАНДАЙ БЕЛГІЛІ БІР ОРЫНҒА КІМ ТАЛАСЫП ЖАТҚАНЫ, КІМ ҚАЙ ЕСІКТІ ҚАҒЫП ЖҮРГЕНІ, ТІПТІ КІМНІҢ КІМДІ АРАҒА САЛЫП ЖҮРГЕНІНЕ ДЕЙІН ЕЛ-ЖҰРТ БІЛІП ОТЫРАТЫН. «ТАМЫР-ТАНЫССЫЗ БАСТЫҚ БОЛУ ҚИЫН» ДЕГЕН ҰҒЫМ САНАДА СІҢІСТІ БОЛЫП ҚАЛҒАН ЕДІ. АЛ ҚАЗІР КЕРІСІНШЕ, МІНДЕТТЕРДІ АБЫРОЙМЕН АТҚАРА АЛАТЫН МЕКТЕП ЖӘНЕ БАЛАБАҚША БАСШЫЛАРЫНЫҢ ТАПШЫЛЫҒЫ БАЙҚАЛЫП ОТЫР. БҰЛ ЖАҒДАЙ БІЛІМ БЕРУ САПАСЫНА ТІКЕЛЕЙ ӨСЕР ЕТЕТІН МАҢЫЗДЫ МӘСЕЛЕ РЕТІНДЕ НАЗАР АУДАРУДЫ ҚАЖЕТ ЕТЕДІ.

# Басшысы жоқ БАЛАБАҚША ЖЕТІМ

ОРЫН БОС, БӘСЕКЕ ЖОҚ

Қазіргі таңда білім беру мекемелерінің басшылары бұрынғыдай жоғарыдан тікелей тағайындалмайды. Оның орнына ашық конкурс жүйесі енгізілді. Кімнің білімі мен тәжірибесі жеткілікті, сол іріктеліп, тәжірибелесу кезеңдерінен өткен соң ғана директор атанады. Бұл өзгерістің басты мақсаты – сыбайлас жемқорлықтың алдын алу, тамыр-таныстыққа тосқауыл қою, жүйенің өділ әрі ашық жұмыс істеуін қамтамасыз ету.

Бір карағанда, бұл – өте дұрыс кадам. Жемқорлықпен күрестегі маңызды бастама ретінде бағалауға болады. Дегенмен «таяқтың

екі ұшы бар» демекші, бұл жүйенің де өзіндік қиындықтары мен ескертін тұстары жоқ емес. Ең басты мәселе – бәсекеңіз төмендігі. Ашық конкурс жарияланғанымен, үміткер табу қыштан-қыштан кындап барады. Көп жағдайда басшылық орындарға өтініш берушілер саны тым аз, тіпті мүлде болмай қалатын кездер де кездеседі. Атырау облысындағы жағдай – осының айқын дәлелі. Бұл – білім саласындағы кадрлық әлеуеттің әлсіреп отырғанын көрсететін дабыл іспетті.

Осылайша көптеген мектеп пен балабақшада директорлық қызмет уақытша міндетін атқарушы педагогтарға жүктелуде. Алайда олар да бұл жұмысты ұзақ уақыт атқаруға құлықты емес. Неге? Оның сан түрлі себебі бар көрінеді.



(Соңы 16-бетте)

